

察乎四大為形，五根具體，變動無恆，違反非一，致相乖逆，固有病生。病患生起，須假藥除，如世尊說：「有病人，得隨病藥，隨病食，如法看病，而死；或有病人，得隨病藥，隨病食，如法看病，而活；有病人，得隨病藥，隨病食，得如法看病人，病必差，不得便死。」是故如來，為說醫經，及藥健度，使諸弟子，得安樂住，而免禍害。

凡為病起，從四緣生，若識四緣，治之無謬。如《醫經》說：「人身中本有四病，一地、二水、三火、四風。風增氣起，火增熱起，水增寒起，土增力盛，本從是四，起四百四病。故，土屬身，水屬口，火屬眼，風屬耳，火少寒多目冥。」

義淨法師曰：「地增令身沈重，水積涕唾乖常，火盛頭胸壯熱，風動氣息擊衝，即當神州沈重，痰廕、黃熱、氣發之異名也。」《智度論》云：「四百四病者，四大為身，常相侵害，一一大中，百一病起。冷病有二百二，水風起故；熱病有二百二，地火起故。火熱相，地堅相，堅相，故難消；難消，故能起熱病。血肉筋骨脈髓等，是地分，除其業報者，一切法皆和合因緣生也」。《雜事》云：「風病百一，黃病百一，痰廕病百一，總集病百一。」